

摘藻堂四庫全書薈要

集部

欽定四庫全書薈要

集部

元詩選初集卷十八

詳校官候選知縣臣吳甸華



欽定四庫全書薈要卷二萬三百七十八

集部

元詩選初集卷十八

長洲

顧嗣立

編

趙孟頫松雪齋集

孟頫字子昂宋秦王德芳之後五世祖秀王子偁  
實生孝宗賜第于湖州故孟頫為湖州人年十四

以父蔭補官宋亡家居益自力于學侍御史程鉅  
夫奉詔搜訪遺逸以孟頫入見神彩煥發如神仙  
中人世祖顧之喜欲大用之議者不可授兵部郎

中遷集賢直學士出同知濟南總管府歷江浙等

處儒學提舉延祐中累拜翰林學士承旨得請歸

至治初卒年六十九追封魏國公諡文敏子昂以

書法稱雄一世畫入神品四方萬里重購其詩文

者所至車馬填咽自號松雪道人有松雪齋集史

稱其清邃竒逸讀之使人有飄飄出塵之想戴帥

初謂其古詩沈湎鮑謝自餘諸作猶傲睨高適李

翱間仁宗與侍臣論文學之士以子昂比唐李太

白宋蘇子瞻云虞雍公伯生嘗以詩詣子昂有山  
連閣道晨留輦野散周廬夜屬橐之句子昂曰若  
改山為天野為星則尤美矣伯生心服之故有元  
之盛稱虞趙楊范揭焉子昂以宋王孫仕元為顯  
官其從兄子固耻之閉門不肯與見子昂之沒也  
宋逸士子虛題其詩卷曰文在玉堂多煥爛淚經  
銅狄一滂沱原陵禾黍悲豐鎬人物風流繼永和  
亦深惜之詞也子雍奕並以書畫知名

有所思

思與君別來幾見芙蓉花  
盈盈秋水若在天一涯  
欲涉不得去茫茫足煙霧  
汀洲多芳草何心采蘅杜  
青鳥翔雲間錦書何時還  
君心雖匪石祇恐彫朱顏  
朱顏不可仗一作復那能不惆悵  
何如雙翡翠飛去蘭苔上

和子俊感秋二首

明月照北林翩翩棲鳥翻  
虛室當靜夜幸絕人事喧  
念子已獨寐無人相語言  
吾生性坦率與世無競奔  
空懷

丘壑志耿耿固常存何由持此意往與嚴鄭論

白露泣然墜草木日以彫閒居無塵雜日薄風脩脩登  
高寫我心葵扇欲罷搖感時俯逝水回睇仰層霄松喬  
在何許高蹈不可招願言從之遊懷古一何遙

歲莫和剛父雜詩二首

驚飈吹白日流光忽蹉跎登山采衆芳荆蓁一何多迷  
途幸未遠迴車且委蛇黃鵠志四海雀鷄將如何

肥馬黃金鞍輕裘華且鮮竭來從橫馳意氣何翩翩朝

為人所慕夕已為世憐此道固應爾禍福非虛言生當  
稱善人死當謚為賢勿羨夸毗子狂馳終百年

東郊

晨興理孤榜薄言東郊遊清風吹我衣入袂寒颼颼幽  
花媚時節弱蔣依寒流山開碧雲歛日出白煙收曠望  
得所懷欣然消我憂中流望城郭蔥蔥佳氣稠人生亦  
已繁惠養要須周約身不願餘尚恐乏所求且當置勿  
念乘化終歸休



寄題右之此靜軒

卜居無喧寂尚論心所宗山林苟不靜亦與朝市同聞  
君南窗下寄傲樂無窮曲肱有餘趣戰勝紛華中好風  
從何來吹子庭前松清琴時一彈濁酒尊不空頗恨道  
里賒不得往相從人事矧好乖我心何時降

趙邨道中

朝出南郭門遙指西山陰馬蹏與石鬬宛轉愁我心溪  
谷莽回互寒風振穹林黃葉灑我衣巖泉走哀音淒淒

霜露降窮思浩難任人生亦何為百年成古今華堂昔  
燕處零落歸丘岑況復不得保悲來淚沾襟

奉酬戴帥初架閣見贈

仙人海上來遺我珊瑚鉤晶光奪凡目竒采耀九州自  
吾得此寶晝玩夜不休生世勿恨晚及與斯人傳惜哉  
無瓊玖可以結綢繆世德日下哀古風向誰求蛾眉亦  
何有空受衆女仇適俗固所願違已良足憂感子贈言  
意再拜涕泣流安得騎麒麟從子以遠遊

桐廬道中

歷歷山水郡行行襟抱清  
兩崖束滄江扁舟此宵征  
卧聞灘聲壯起見渚煙橫  
西風林木淨落日沙水明  
高旻衆星出東嶺素月生  
舟子櫂歌發含詞感人情  
苦不遠東山有遺聲豈不懷  
燕居簡書趣期程優游恐不  
免驅馳竟何成我生悠悠者  
何日遂歸耕

張詹事遂初亭

青山繚神京佳氣溢芳甸  
林亭去天咫萬狀爭自獻  
年

多嘉木合春晚餘花殿雕闌留戲蝶藻井語嬌燕退食  
鳴玉珂友于此終宴鐘鼓樂清時衣冠集羣彥朝市塵  
不侵圖書味方遠紛華雖在眼道勝安用戰初心良已  
遂雅志由此見何事江海人山林未如願

罪出

在山為遠志出山為小草古語已云然見事苦不早平  
生獨往願丘壑寄懷抱圖書時自娛野性期自保誰令  
墮塵網宛轉受纏繞昔為水上鷗今如籠中鳥哀鳴誰

復顧毛羽日摧槁何非親友贈蔬食常不飽病妻抱弱  
子遠去萬里道骨肉生別離丘壘誰為一作婦愁深無  
一語目斷南雲香慟哭悲風來如何訴穹昊子昂作詠  
逸民詩十  
一首而出處之義有乖  
宜此詩之深自悔也

### 禱雨龍洞山

蒼山如犬牙細路入深谷絕壁千餘仞上有凌雲木陰  
崖不受日洞穴自成屋蕭森人跡少蒼蔚獸攸伏雲林  
互隱映澗道相迴復翔禽薄穹霄鳴鳥響巖曲臨橋濯

清颶汲井漱寒玉神物此淵潛愆陽有祈祝風濤漸善  
教吏懦恥厚祿暫懷塵外想獨往疑有桔過幽難久居  
濟勝之高躅策馬尋故蹊歸樵相追逐

題歸去來圖

生世各有時出處非偶然淵明賦歸來佳處未易言後  
人多慕之效顰惑蚩妍終然不能去俯仰塵埃間斯人  
真有道名與日月懸青松卓然操黃華霜中鮮棄官亦  
易耳忍窮北窻眠撫卷常三歎世久無此賢

題耕織圖二十四首奉懿旨撰

田家重元日置酒會鄰里小大易新衣相戒未明起老  
翁年已邁含笑弄孫子老嫗惠且慈白髮被兩耳杯盤  
且羅列飲食致甘旨相呼團樂坐聊慰哀暮齒田饒藉  
人力糞壤要鋤理新歲不敢閒農事自茲始

正月

東風吹原野地凍亦已消早覺農事動荷鋤過相招遲  
遲朝日上炊煙出林梢土膏脈既起良耜利若刀高低  
徧翻墾宿草不待燒幼婦頗能家井臼常自操散灰緣

舊俗門逕環周遭所冀歲有成殷勤在今朝

二月

良農知土性肥瘠有不同時至萬物生芽藥由地中秉  
耒向畎畝忽徧西與東舉家往于田勞瘁在爾農春雨  
及時降被野何濛濛乘茲各布種庶望西成功培根利  
秋實仰天望年豐但使陰陽和自然倉廩充

三月

孟夏土加潤苗生無近遠漫漫冒淺陂芄芃被長阪嘉  
穀雖已殖惡草亦滋蔓君子與小人並處必為患朝朝  
荷鋤往薅耨忘疲倦旦隨鳥雀起歸與牛羊晚有婦念



將飢過午可無飯一飽不易得念此獨長歎

四月

仲夏苦雨乾二麥先後熟南風吹隴畝惠氣散清淑是  
為農夫慶所望實其腹酤酒醉比鄰語笑聲滿屋紛然  
收穫罷高廩起相屬有周成王業后稷播百穀皇天貽  
來年長世自茲卜願言仍歲稔四海盡蒙福

五月

當晝耘水田農夫亦良苦赤日背欲裂白汗灑如雨  
匍匐行水中泥淖及腰脊新苗抽利劒割膚何痛楚夫耘  
婦當饁奔走及亭午無時暫休息不得避炎暑誰憐萬

民食粒粒非易取願陳知稼穡無逸傳自古

六月

大火既西流涼風日淒厲古人重稼穡力田在匪懈郊  
行省農事禾黍何旆旆碾以他山石玉粒使人愛大祀  
須粢盛一一稽古制是為五穀長異彼稊與稗炊之香  
且美可用享上帝豈惟足食人一飽有所待

七月

白露下百草莖葉日紛委是時禾黍登充積徧都鄙在  
郊既千庾入邑復萬軌人言田家樂此樂誰可比租賦  
以輸官所餘足儲峙不然風雪至凍餒及妻子優游茅

簷下庶可以卒歲太平元有象治世乃如此

八月

大家饒米麪何啻百室盈縱復人力多舂磨常不停激  
水轉大輪磴碾亦易成古人有機智用之可厚生朝出  
連百車莫入還滿庭勾稽數多寡必假布算精小人好  
爭利晝夜心營營君子貴知足知足萬慮輕

九月

孟冬農事畢穀粟既已藏彌望四野空藁秸亦在場朝  
廷政方理庶事和陰陽所以頻歲登不憂旱與蝗置酒  
燕鄉里尊老列上行肴羞不厭多烹羔復烹羊縱飲窮

日夕為樂殊未央  
禱天祝聖人萬年長壽昌

十月

農家值豐年樂事日熙熙  
黑黍可釀酒在牢羊豕肥  
東鄰有一女西鄰有一兒  
兒年十五六女大亦可笄  
財禮不求備多少取隨宜  
冬前與冬後昏嫁利此時  
但願子孫多門戶可扶持  
女當力蠶桑男當力耘耔

十一月

一日不力作一日食不足  
慘淡歲云暮風雪入破屋  
老農氣力衰偃僂腰背曲  
索綯民事急晝夜互相續  
飯牛欲牛肥艾蒿亦預蓄  
寒驢雖劣弱挽車致百斛  
農家極

勞苦歲豈恒稔熟能知稼穡艱天下自蒙福

十二月

右耕

正月新獻歲最先理農器女工竝時興蠶室臨期治初  
陽力未勝早春尚寒氣窻戶當奧密勿使風雨至田疇  
耕耨動敢不脩耒耜經冬牛力弱相戒勤飯飼萬事非  
預備倉卒恐不易田家亦良苦舍此復何計

正月

仲春凍初解陽氣方滿盈旭日照原野萬物皆欣榮是  
時可種桑插地易抽萌列樹徧阡陌東西各縱橫豈惟

籬落間採葉憚遠行大哉皇元化四海無交兵種桑日  
已廣彌望綠雲平匪惟錦綺謀祇以厚民生

二月

三月蠶始生纖細如牛毛婉孌閨中女素手握金刀切  
葉以飼之擁紙散周遭庭樹鳴黃鳥發聲和且嬌蠶饑  
當採桑何暇事遊遨田時人力少丈夫方種苗相將挽  
長條盈筐不終朝數口望無寒敢辭終歲勞

三月

四月夏氣清蠶大已屬眠高首何昂昂蛾眉復娟娟不  
憂桑葉少徧野如綠煙相呼攜筐去迢遞立遠阡梯空

伐條枚葉上露未乾蠶飢當早歸秉心靜以專飭躬修  
婦事黽勉當盛年救忙多女伴笑語方喧然

四月

五月夏已半谷鷲先弄晨老蠶成雪繭吐絲亂紛紜伐  
葦作薄曲束縛齊榛榛黃者黃如金白者白如銀爛然  
滿筐筥愛此顏色新欣欣舉家喜稍慰經時勤有客過  
相問笑聲聞四鄰論功何所歸再拜謝蠶神

五月

釜下燒桑柴取繭投釜中纖纖女兒手抽絲疾如風田  
家五六月綠樹陰相蒙但聞繰車響遠接邨西東旬日

可經絹弗憂杼柚空婦人能蠶桑家道當不窮更望時

雨足二麥亦稍豐酤酒田家

一作及時

飲醉倒姬

一作姑

與翁

六月

七月暑尚熾長日弄機杼頭蓬不暇梳揮手汗如雨  
嚶嚶時鳥鳴灼灼紅榴吐何心娛耳目往來忘偃僂織為  
機中素老幼要紉補青燈照夜梭蟋蟀窗外語辛勤亦  
何有身體衣幾縷嫁為田家婦終歲服勞苦

七月

池水何洋洋漚麻水中央數日庶可取引過兩手長織



絹能幾時織布已復忙依依小兒女歲晚歎無裳布襦  
不掩脛念之熱中腸朝緝滿一籃暮緝滿一筐行看機  
中布計日漸可量我衣苟已成不憂天早霜

八月

季秋霜露降凜凜寒氣生是月當授衣有布織未成天  
寒催刀尺機杼可無營教女學紡繡舉足疾且輕舍南  
與舍北嚶嚶聞車聲通都富豪家華屋貯娉婷被服雜  
羅綺五色相間明聽說貧家女惻然當動情

九月

豐年禾黍登農心稍逸樂小兒漸長大終歲荷鋤耰目

不識一字每念心作惡東鄰方迎師收拾令上學後月  
日南至相賀因舊俗為女裁新衣修短巧量度龜手事  
塞向庶禦北風虐人生真可歎至老長力作

十月

冬至陽來復草木潛滋萌君子重其然吾道自此亨父  
母坐堂上子孫列前榮再拜稱上壽所願百福并人生  
屬明時四海方太平民無札瘥者厚澤敷羣情衣食苟  
給足禮義自此生願言興學校庶幾教化成

十一月

忽忽歲將盡人事可稍休寒風吹桑林日夕聲颼颼牆

南地不凍墾掘為坑溝斫桑埋其中明年芽早抽是月  
浴蠶種自古相傳流蠶出易脫殼絲續亦倍收及時不  
努力知有來歲不手凍不足惜冀免號寒憂

十二月

右織

次韻周公謹見贈

池魚思故淵檻獸念舊藪官曹困窘束卯入常盡酉簡  
書督期會何用傳不朽十年從世故塵土滿衣袖歸來  
忽相見忘此離別久緬想德翁隱坐羨沮溺耦新詩使

我和曠里忘已醜平生知我者頗亦似公否山林期晚  
歲雞黍共尊酒却笑桓公言淒然漢南柳

哀鮮于伯幾

生別有再逢死別終古隔君死已五年追痛猶一日我  
生大江南君長淮水北憶昨聞令名官舍始相識我方  
二十餘君髮黑如漆契合無間言一見同宿昔春遊每  
拏舟夜坐常促席氣豪聲若鐘意憤髯屢戟談諧雜叫  
嘯議論造精覈魏煌商鼎制駟駿漢馬式奇文既同賞

疑義或共析錦囊裝玉軸妙絕晉唐跡粲然極炫曜觀  
者咸辟易非君有精鑒疇能萃奇物最後得玉鉤琬琰  
螭盤屈握手傳玩餘歡喜見顏色刻意學古書池水欲  
盡黑書記往來間彼此各有得我時學鍾法寫君先墓  
石江南君所樂地氣苦下溼安知從事衫竟卒奉常職  
至今屏障間不忍覩遺墨淒涼方井路松竹蔭真宅乾  
坤清氣少人物世罕覲緋袍儼畫像對之淚沾臆宇宙  
一何悠悲酸豈終極

新秋

夜久不能寐坐來秋意濃  
露涼催蟋蟀月白澹芙蓉  
漸覺練衣薄欲將紈扇慵

慶壽僧舍即事

白雨映青松蕭颯灑朱閣  
稍覺暑氣銷微涼度疎箔  
客居秋寺古心跡俱寂莫  
夕蟲鳴階砌孤螢炯叢薄  
展轉懷故鄉時聞風鳴鐸

遊幻住菴

雨後溪水溢黃流行地中輕舟何迅邁沿波兼順風碧  
蘆葦始長柔桑葉已空瞬息抵山曲窈窕微逕通青林  
夾道周流泉響幽叢多慚衆衲子前路相迎逢禪居新  
結構斧斤未輟工雙閣出塵囂六窓自玲瓏久矣厭城  
市飄如脫樊籠妙香清鼻觀新鷺驚耳聾汲水插山花  
開牖納風松經聲出廊廡寂然聞鼓鐘蔬食飲一飽亦  
與膏粱同緬懷老尊宿燕坐毘盧峰塵緣苦未斷無由  
往相從一宿返歸棹迴望但青蔥

清河道中

揚舲清河流開蓬素秋曉  
爛斑被厓花委蛇順流藻  
天清去鴈高野闊行人小  
故園歸有期客愁淨如埽

七月六日承貞居先生遠寄周鍾銑間有文象  
鳧之形則考工記所謂鳧氏為鐘者也擊之與  
夷則合而是日又適立秋古物之來豈偶然哉  
輒成小詩拜貺之辱

故人賞我趣遺我鳧氏鐘  
制與周禮合試叩聲春容是



日新秋節夷則還為宮懸之西楮下浮磬儼在東金石  
互相應間以絲與桐八音雖未備古樂將無同鼎尊鐸  
解卣羅列見古風揖讓於其間令我懷周公作詩報嘉  
貺庶以開羣聾

題錢舜舉著色梨花

東風吹日花冥冥繁枝壓雪凌風塵素羅衣裳照青春  
眼中若有梨園人攀條弄芳畏日夕只今紙上空顏色  
顏色好愁轉多與君酤酒花前歌

題西溪圖贈鮮于伯幾

山林忽然在我眼攬袂欲遊嗟已遠長松謾謾含蒼煙  
平川茫茫際曾巘大梁繁華天下稀走馬鬪雞夜忘歸  
君獨胡為甘寂莫坐對山水娛清暉西谿先生奇崛士  
正可著之巖石裏數間茅屋破不修中有神光發奇字  
綠蘋齊葉白芷生送君江南空復情相思萬里不可見  
時對此圖雙眼明

戲題出洗馬

齧邾罇駕誰能御駕蹇紛紛何足顧青絲絡首錦障泥  
鞭箠空勞怨長路明窻戲寫乘黃姿洗刷歸來氣如怒  
不須對此苦歎嗟男兒自昔多徒步

送孟仲則遊荆湖兼往襄漢

行路方難子何往瀟湘洞庭天一方長江風來浪如雪  
荆門木落天雨霜千金養客不復見萬里訪舊庸何傷  
子才有用未得試牛刀愛惜藏鋒鋠似聞遠遊未渠央  
更欲攬轡趨襄陽昔年戰鬥且休息白骨已瘞愁雲黃

伏龍鳳雛在何處鹿門山色還蒼蒼登高弔古一長嘯  
萬事慘淡悲中腸人生聚散安可常為君起舞君舉觴  
明朝帆影拂浮玉寄言客居思故鄉

烈婦行

并序

至元七年冬濱州軍士劉平之戍棗陽與其妻胡  
俱道宿車下平為虎所得胡起追及之殺虎脫其  
夫吾聞之中原賢士大夫如此乃為感激慷慨作  
烈婦行以歌之

客車何燁燁夫挽婦為推問君將安去言往棗陽戍官  
事有程宿車下夜半可憐逢猛虎夫命懸虎口婦怒髮  
指天十步之內血相濺夫難再得虎可前寧與夫死毋  
與虎生呼兒取刃力與爭虎死夫活心始平男兒節義  
有如許萬歲千秋可以事明主馮婦卞莊安足數嗚呼  
猛虎逢尚可寧成寧成奈何汝

送高仁卿還湖州

昔年東吳望幽燕長路北走如登天捉來官府竟何補

還望故鄉心惘然江南冬暖花亂發朔方苦寒氣又偏  
木皮三寸冰六尺面頰欲裂凍折弦盧溝強弩射不過  
騎馬徑度不用船宦遊遠客非所習狐貉不具綈袍穿  
京師宜富不宜薄青衫駿馬爭騰騫南鄰吹笙厭梁肉  
北里鼓瑟羅姝妍淒涼朝士有何意瘦童羸騎雞鳴前  
太倉粟陳未易糴中都俸薄難裹纏爾來方士頗向用  
讀書不若燒丹鉛故人聞之應見笑如此不歸殊可憐  
長林豐草我所愛羈勒未脫無由緣高侯遠來肯顧我

裏茗抱被來同眠青燈耿耿照土屋白酒薄薄無葷羶  
破愁為笑出軟語寄書妻孥無一錢江湖浩渺足春水  
鳬鴈滅沒橫秋煙何當乞身歸故里圖書堆裏消殘年  
謝鮮于伯幾惠震餘琴云是許旌陽手植桐所斲

仙人已歸白雲中空餘手植青枝桐根柯盤鬱如蛟龍  
一朝霹靂驅雷公烈火半焚隨狂風箕子之裔多髯翁  
才氣邁俗驚愚蒙抱持來一作東歸尋國工斲為二琴合

商宮我來自北欣相逢持一贈我為我容自吾得此不

敢寐

一作慵

終

一作中

夜起坐彈孤

一作秋

鴻下絃清冷上黃

鐘轉絃更張涕滿胸黃虞已遠將無同恨君不識牙與  
鍾恨我不識瞽與矇周南大雅當誰從

贈相者

吾聞伯樂善相馬一顧千金長高價何人倜儻買權奇  
滿眼駑駘居櫪下張君年少目有神走半江湖多閱人  
我生瘦悞乏駿骨浪許騰驤防失真連朝春雨今始晴



花枝點眼生春情樓前山色橫翠靄湖上柳黃飛亂鶯  
便須酤酒與君飲醉倒花前猶滿引懶從唐舉問流年  
欲向德翁謀小隱

題商德符學士桃源春曉圖

宿雲初散青山溼落紅繽紛溪水急桃花源裏得春多  
洞口春煙搖綠蘿綠蘿搖煙挂絕壁飛流淙

一作直

下三

千尺瑤草離離滿澗阿長松落落凌空碧雞鳴犬吠自成  
邨居人至老不相識瀛洲仙客知仙路點染丹青寄

輕素何處有山如此圖移家欲向山中住

秋夜曲二首

雨聲滴夜清漏長朱簾金幕浮新涼閨中美人動裁剪  
故羅衣袂生秋香東鄰剝棗西鄰穫旅館無人念飄泊  
餘不潦盡涵清輝笑容壓堤怨不歸牆根草綠陰蛾飛  
蒲萄架空墮殷玉遙夜露寒生體粟暗蛩棲草鳴不平  
無絲絡緯空勞促夢魂苦短道苦長萬山深處非吾鄉  
玉蟲搖釭螢入屋去鴈來魚應可卜醒眼熒熒愁萬斛

孔道輔擊蛇笏

以笏擊蛇有孔公義與段公擊賊同事之鉅細雖有異  
正氣憤激生于中偉哉孔公聖人裔豈聽妖邪亂民志  
即今槐木一尺強氣象凜凜含風霜子孫守之慎寶藏  
絕勝象牙堆滿牀

燕脂駿圖歌

騏驎腰褭世常有伯樂不生淹棧豆歛見此圖神自王  
權奇磊落龍為友隅目晶熒生紫光錦毛錯落蒙清霜

霜蹠蹙踏寒玉響霧鬣振動秋風涼朝浴扶桑騰浩蕩  
莫秣崑崙超象罔雄姿似隘六合小盛氣欲箭浮雲上  
嗅塵一歎驚肉飛奮迅不受人間戰豈惟萬馬羞欲死  
直與八駿爭先馳只今相者多舉肥歎息此圖誰復知  
君不見王處冲半生隱德真成癡

魏公自幼好畫馬友人郭祐之贈詩云世

上但解比龍眠那知已出曹韓上

賦張秋泉真人所藏研山

泰山亦一拳石多勢雄齊魯青魏我此石却是小岱岳

峰巒無數生陂陀千巖萬壑來几上中有絕澗橫天河  
粵從混沌元氣判自然凝結非鐫磨人間奇物不易得  
一見大叫爭摩挲米公平生好奇者大書淡刻無差謫  
傍有小研天所造仰受筆墨如圓荷我欲為君書道德  
但願此石不用驚巧偷豪奪古來有問君此意當如何

兔

少年馳逐燕齊郊身騎駿馬如騰蛟耳後生風鼻出火  
大呼討來飛鳴髀如今老大百憂集拄杖徐行防喘急

卷中見畫眼為明驥聞秋風雙耳立

討來國朝語謂免也

春寒

夜雨鳴高枕春寒入敝袍時光自花柳吾意豈蓬蒿失色黃金盡知音白雪高山林隱未得空覺此生勞

雪後同子俊遊何山次韻二首

兵革時猶動山林日就荒子真思隱遯詹尹問

一作卜

行

藏有意隨三飯無人饋五漿遠山湖外白立馬見微茫湍駛波翻雪風生地出雷薄醪隨意盡寒氣逼人來更

欲明朝去何妨迫莫回自憐非李廣醉尉莫一作勿相猜

### 早春

谿上春無賴清晨坐水亭草芽隨意綠柳眼向人青初  
日收濃霧微波亂小星誰歌采蘋曲愁絕不堪聽

### 重遊弁山

竹色速行逕松聲洶座隅水清花自照風暖鳥相呼飲  
罷思碁局歌長缺唾壺重來瀟灑地聊足慰須臾

### 魚樂樓

樓下南來水清冷百尺深菰蒲終夜響楊柳半谿陰日  
月驅人世江湖動客心向來歌舞宴達曉看橫參

次韻陳無逸中秋月食風雨不見

谿月當圓夜看雲起莫愁曾陰連積水伏雨暗清秋白  
璧難容玷明珠不可求每因觀節物轉覺此生浮

次韻子山登樓有感二首

西北高樓好登臨望眼空弁山橫雨外笠澤浸天東計  
乏千金藥羞看百鍊銅只應將順一作世事都付酒杯中



懷古情何極登危氣尚雄江山一時勝宇宙百年中翠  
袖愁空谷綈袍受朔風超然高舉意決皆送孤

一作飛

鴻

次韻馮伯田秋興二首

風緊草木變露寒沙水清蕭蘭嗟共悴鷓鴣忍先鳴黃  
閣非吾事青山不世情浩歌聊感激裘馬任肥輕  
興逐秋風發愁隨秋水長繫書陽鳥遠促織候蟲忙世  
已無劉表家徒有孟光故衣寒未補發篋動幽香

奉和帥初兄將歸見簡二首

戴子文章伯不為時所知朱絃非衆聽白壁易羣疑海  
樹生秋早江船度越遲莫愁千里別要作百年期

我坐幽憂疾非君誰與娛清談忘日夜高論到唐虞天  
地無青眼江湖有白鬚客居寧鬱鬱歸興託蓴鱸

和周景遠見寄

四海多兄弟交情子獨親方將尋舴艋何意畫麒麟簿  
領淹豪士江湖著散人相看俱老大喜見二毛新

大都遇平江龍興寺僧閒上座話唐綦毋潛宿

龍興寺詩因次其韻

聞說龍興寺多年未款扉  
風林發松籟雨砌長苔衣  
殿古燈光定房波磬韻微  
秋風動歸興一錫向空飛

送翟伯玉雲南省都事

萬里雲南路青山落照邊  
省郎新紫綬幕府舊紅蓮  
見面嗟吾晚觀文覺子賢  
只應清淑氣不受瘴溪煙

雨

撼撼衆葉響滋滋生意新  
知誰實揮灑解使盡圓勻  
蛛

網懸珠絡荷盤瀉永銀喜涼生枕簟愁潤逼衣巾

次韻觀復表兄見簡

載酒無人到山園晝掩門泥濘妨步履雨暗只空邨每  
憶文園渴難忘北海尊何當來就飲聽我撫桐孫

送董參政赴召

丹極飛明詔鋒車召老臣仲舒經術邃賈誼讜言陳偃  
草懷殊俗安田慰遠人公心如皦日江國自熙春散亂  
堆牀帙蕭颼滿案塵詭隨吾不忍高卧理還伸入奏能

回主當言莫愛身  
衮衣瞻望重丈席  
侍趨頻鉛槧工無  
益樵漁意已親  
白鷗波萬里浩蕩  
未能馴

投贈刑部尚書布呼蜜公

胄子何多士明公特妙年  
詩書師法在簪紱相門傳  
曳履星辰上分光日月邊  
帝心知俊彥羣望屬英賢  
大木明堂器朱絲清廟絃  
古人詞自寡君子德為先  
斷獄陰功厚優儒禮數偏  
我非天下士人謂地行仙  
山好雙遊屐溪清一釣船  
賦詩時遣興好客恨無錢  
政爾韋編絕

俄聞束帛爰風塵驅驛騎霜雪灑鞍韉別婦經春夏離  
鄉整四千家書愁展讀旅食困憂煎郎位蒙超擢官曹  
幸接聯屢聞哦鄙句信或有前緣知己誠難遇捫心益  
自憐樊中淹澤雉春晚怨啼鵲驥病思豐草鴻冥羨遠  
天仁言如借便白首向林泉

送夾谷公分省陝西

憶從長楊獵于時始識公堂堂九尺幹落落萬夫雄補  
袞彌縫密能書點畫工勞謙延士類豈弟到兒童黃閣

歸人望青雲有父風驅馳常扈從奏對每留中暫輟尚  
書履榮分陝右弓秦山依畫錦燕雪感秋蓬粉署趨承  
舊瀛洲忝竊同因公動鄉思飛夢過江東

題楊司農宅劉伯熙畫山水圖

移得山川勝坐來煙霧空  
窻中列遠岫堂上見青楓  
巖樹參差綠林花掩冉紅  
鳥飛天路迴人去野橋通  
邛晚留遲日樓高納快風  
琴尊會仙侶几杖從兒童  
疑聽孫登嘯將無顧愷同  
微茫看不足瀟灑興難窮  
碧瓦開蓮

宇丹樓聳竹宮亂泉鳴石上孤嶼出江中藉甚丹青譽  
益知書畫功煩渠添釣艇著我一漁翁

和姚子敬秋懷五首

銅爵春深漢苑空邯鄲月冷照秦宮煙花樓閣西風裏  
錦繡湖山落照中河水南來非禹迹冀方北去有唐風  
溪城秋色催遲暮愁對黃雲沒斷鴻

落日孤城動鼓鼙愁中畫角不勝吹山川蕭瑟秋雲淨  
草木彫傷暮雨悲多病馬卿聊假日數奇李廣不逢時



卷簾白水青山裏，隱几無言有所思。

搔首風塵雙短鬢，側身天地一儒冠。中原人物思王猛，

江左功名愧一作憶

謝安。苜蓿秋高戎馬健，江湖日短白

鷗寒。金尊綠酒無錢共，安得愁中却暫一作盡

歡。

吳宮煙冷水空流，慘澹風雲暗九

一作點素

秋禾黍故基曾

駐輦。芙蓉高閣迴添愁，繡楹錦柱蛟龍泣。金沓瑤階鹿

豕遊，宋玉平生最蕭索。欲將九辯賦離憂，

野曠天高

一作低

木葉疎。水清沙白鳥相呼，胡笳處處軍

麾滿鬼哭邛邛漢月孤新亭舉目山河異故國傷神夢

寐俱黃菊欲開人卧病可憐三逕已荒蕪

子昂云作詩用虛字殊不

佳中兩聯填滿方好殆以此力矯時弊邪

聞擣衣

露下碧梧秋滿天砧聲不斷思縣縣北來風俗猶存古  
南渡衣冠不及前首宿總肥宛腰裏琵琶曾泣漢嬋娟

人間俯仰成今古

一作昔

何待他

一作當

年始惘然

登飛英塔

梯颺直上幾百尺俯視層空鳥背過千里湖山秋色淨  
萬家煙火夕陽多魚龍袞袞危舟楫鴻鴈冥冥避罔羅  
誰種山中千樹橘側身東望洞庭波

### 岳鄂王墓

鄂王墓

一作墳

上草離離秋日荒涼石獸危南渡君臣輕

社稷中原父老望旌旗

一作麾

英雄已死嗟何及天

一作何嗟

下中分遂不支莫向西湖歌此曲水光山色不勝悲

陶南

邨云岳王墓詩不下數十百篇其膾炙人口者莫如趙魏公作

溪上

溪上東

一作春

風吹柳花溪頭春水淨無沙白鷗自信無

機事元鳥猶知有歲華錦纜牙檣非昨夢鳳笙龍管是

誰家令人苦憶東陵子擬問

一作何

田園學種瓜

次韻剛父無逸遊南山作

絕頂清秋凌翠

一作紫

煙登臨應費酒如川平生能著幾

兩屐負郭何須二頃田初日出雲光射地雙溪入湖波

接天升高望遠我所愛青壁有路何當緣

次韻信仲晚興

蕭蕭殘照晚當樓  
寒葉踈雲亂客愁  
歲月蹉跎星北指  
乾坤浩蕩水東流  
古來人物俱黃土  
少日心情在一丘  
獨立無言風滿袖  
青山相對共悠悠

次韻王時觀

相思吳越動經年  
一見情深重惘然  
草木變衰人易老  
江湖牢落鴈難前  
秦山半出青天上  
禹穴遙臨古道邊  
欲說舊遊渾似夢  
何時重上剡溪船

錢唐懷古

東南都會帝王州三月鶯

一作煙

花非舊遊故國金人泣

辭漢當年玉馬去朝周湖山靡靡今猶在江水悠悠只  
自流千古興亡盡如此春風麥秀使人愁

次韻舜舉春日感興

沙頭春日已暄妍細柳新蒲色共鮮世事底須求分外  
人生何物勝尊前飛花冉冉催華髮宿草青青失古阡  
回首舊歡如夢過不知今日是何年

紀舊遊

二月江南鷺亂飛百

一作雜

花滿樹柳依依落紅無數迷

歌扇嫩綠多情妒舞衣金鴨焚香川上暝畫船撸鼓月中歸如今寂莫東風裏把酒無言對夕暉

次韻章得一同原父姪遊蘭澤

綠樹閭閻草接天已愁春盡更聞鶉落花飛絮都成恨  
痛飲狂歌渾欲顛起舞有人如謝尚著書無意似伶玄  
繡筵寶瑟何時會割錦纏頭不計錢

見章得一詩因次其韻二首

水色清連日色黃梨花淡白柳花香即看時節催人事  
更覺春愁惱客腸無酒難供陶令飲從人皆笑酈生狂  
城南風暖遊人少自在晴絲百尺長

片片

一作點點

飛花欲送春萋萋碧草正

一作又

愁人黃蜂釀

蜜經營急紫燕銜泥來去頻才似茂陵非晚遇美如曲  
逆不長貧久知求富都無益但喜論詩若有神

奉和帥初雨中見贈二首



陰雨淒淒生夏寒故人望望惜清歡  
停雲底事能相阻  
后土何時可得乾  
無事甘為犀首飲  
切雲聊著屈平冠  
閉門客散且高卧  
戶外泥深沒馬鞍

正坐清談與世違  
交情如子定應

一作依

稀圖書跌宕心

猶在裘馬清狂意  
已非黃鶴未知何日返  
飢烏故作傍人飛  
谿南流水清如玉  
終擬歸休理釣磯

### 多景樓

層巔官閣幾時修  
遠檻長江萬古流  
白露已零秋草綠

斜陽雖好暮雲稠  
平南籌策張華得  
治內人才葛亮優  
景物未窮登覽興  
角聲孤起甕城秋

東陽八詠樓

山城秋色淨朝暉  
極目登臨未擬歸  
羽士曾聞遼鶴語  
樓在寶婺觀觀中  
老道士能言諸父  
出處征人又見塞  
鴻飛西流二水玻  
璃合南去千峰紫  
翠圍如此山川良  
不惡休文何事不  
勝衣

金陵雨花臺遂至故人劉叔亮墓

雨花臺上看晴空萬里風煙入望中人物車書南北混  
山川襟帶古今同昆蟲一作魚龍未蟄霜先隕鳳鳥不鳴江  
自東綠髮劉伶緣醉死往尋荒冢酹西風

蛾眉亭

天門日湧大江來牛渚風生萬壑哀青眼故人攜酒共  
兩眉今日為君開蒼崖直下蛟龍吼白浪橫空鵝鵲迴

南眺

一作望

青山懷李白沙頭官渡苦相催

時與劉伯宣尚書同登

大都紅門外海子上即事

白水青林

一作山

引興多紅裙翠黛

一作袖

奈愁何底

一作祇

從暮醉兼朝醉聊復長歌更短歌輕燕受風迎落絮老

一作游

魚吹浪動新荷餘不

一作杭

溪上扁舟好何日歸休

理釣蓑

贈周景遠田師孟

與子同客帝王州一日不見如三秋風高氣肅鴈聲急

天青

一作晴

日暖蛛絲遊籬下黃花為誰好水邊紅樹令

人愁世間萬事可撥遣日日痛飲醉即休

送繆秀才教授真州

髯生別我將安適  
言向真州作教官  
但使清風生絳帳  
何妨朝日照空槃  
東園草木因人勝  
北固江山隔岸看  
才近中年已傷別  
可堪南望送歸鞍

次韻左轄相公

昔年閭里自浮沈  
郎省那知遂有今  
老去馮唐堪底用  
愁來莊叟向誰吟  
上林柳色春猶淺  
西塞桃花水正深  
知己如公居鼎鼐  
不應長此泣南音

次韻左轄相公奉寄行臺中丞徐公

盡日沈迷簿領書何時重得賦閒居已無夢想懸金印  
豈有文章到石渠白髮故人霜柏在黃塵遊子斷蓬如  
舊遊憶在吳興日自採谿毛膾白魚

送吳思可總管汀州

七閩南去路崎嶇五馬承恩出帝都地氣喜聞今有雪  
民生寧似昔無襦山城酒美傾鸚鵡雨館春深聽鷓鴣  
他日相思應悵恨離筵不忍賦驪駒

至元庚辰繇集賢出知濟南暫還吳興賦詩書  
懷二首

五年京國誤蒙恩乍到江南似夢魂  
雲影時移半山黑  
水痕新漲一溪渾  
宦途久有曼容志  
婚娶終尋尚子言  
政為踈慵無補報  
非干高尚慕丘園

多病相如已倦遊  
思歸張翰况逢秋  
鱸魚蓴菜俱無恙  
鴻鴈稻粱非所求  
空有丹心依魏闕  
又攜十口過齊州  
閒身却羨沙頭鷺  
飛去飛來百自由

劉端父御史見和初到濟南詩次韻答之

少日居多隱遯情微官猶喜得山城腹中洞視渾無物  
身外何因更有名忽憶放船苔水去終朝背郭草堂成  
故鄉一別三千里看見池塘草又生

次韻端父和鮮于伯幾所寄詩

畫舸西湖到處遊別來飛夢到杭州百年底用憂千歲  
一日相思似幾秋苦憶東南多勝事空吟西北有高樓  
只今賴有劉公幹時寫新詩解客愁



趵突泉

灤水發源天下無平地湧出白玉壺谷虛久一作只恐元

氣泄歲旱不愁東海枯雲霧潤蒸華不注波濤聲震大明湖時來泉上濯塵土冰雪滿懷清興孤

繼鄭鵬南書懷

豈不懷歸苦未閒宦情羈思不成歡可能治郡如龔遂只合臨流似幼安綦局懶從先處著醫方留取用時看夜來夢到茗溪上一枕清風五月寒

德清閒居

已無新夢到清都  
空有高情學隱居  
貧尚典衣貪購畫  
病思棄研厭求書  
園人焚積夜防虎  
谿女叩扉朝賣魚  
困即枕書飢即飯  
謀生自笑一何疎

題山堂

手種青松一萬栽  
山堂留得

一作在

翠屏隈  
推窻綠樹排

簷入臨水紅  
茱對鏡開山  
雉雉迎朝日  
去野禽啼傍夕

陽來老妻亦

一作也

有幽棲意  
數日遲留不肯回

海子上即事與李子構同賦

小姬勸客倒金壺  
家近荷花似鏡湖  
遊騎等閒來洗馬  
舞靴輕妙迅飛鳬  
油雲判污纏頭錦  
粉汗生憐絡臂珠  
只有道人塵境靜  
一襟涼思詠風雩

重用韻

更從何處訪蓬壺  
花滿平堤水滿湖  
韓嫣金丸落飛鳥  
王喬仙履下雙鳬  
姬姜自愛千金貌  
遊俠輕量一斛珠  
我老不知年少事  
水邊行散似春雩

送杜伯玉四川行省都事

浣花溪上草堂存  
今見能詩幾代孫  
橘刺藤梢隱叢竹  
椒漿桂酒薦芳蓀  
日長畫省文書靜  
春近岷江雪浪奔  
我向東吳君向蜀  
別離從古解銷魂

次韻李秀才見贈

曾是先皇侍從班  
龍髯飛去竟難攀  
重來赤日黃塵裏  
夢到清泉白石間  
豈有文章供世用  
久判漁釣與雲閒  
何當便理南歸棹  
呼酒登樓看弁山

人日立春

今年人日與春并人得春來喜氣迎宮柳風微金縷重  
御溝冰泮玉鱗生陰消已覺餘寒散陽長爭看曉日明  
霜鬢綠幡渾不稱強題新句慰羈情

送岳德敬提舉甘肅儒學

苦欲留君君不留奮髯跨

一作躍

馬走甘州功名到手不

可避富貴逼人那得休春酒蒲萄歌窈窕秋沙首宿飽  
驂騑儒冠也有封侯相萬里歸來尚黑頭

贈放煙火者

人間巧藝奪天工，鍊藥燃燈清晝同。  
柳絮飛殘鋪地白，桃花落盡滿階紅。  
紛紛燦爛如星隕，燿燿喧豗似火攻。  
後夜再翻花上錦，不愁零亂向東風。

題溫雪峰詩蹟

出擁旌麾一俊臣，歸尋松竹作閒人。  
龍蛇留遺人間世，泉石逍遙物外身。  
自古神仙皆曠達，由來豪傑豈埃塵。  
山川良是諸孫老，華表歸來又幾春。

勝槩樓

樓下寒泉雪浪驚樓前山色翠屏橫  
登臨何必須吾土  
嘯傲聊因得此生  
簷外白雲來託宿  
梁間紫燕語關情  
濟南勝槩天下少  
試倚闌干眼自明

老態

老態年來日日添  
黑花飛眼雪生髯  
扶衰每藉齊

一作過

省杖食肉先尋剔  
齒櫟右臂拘攣巾  
不裹中腸慘戚淚  
常淹移牀獨就南  
榮坐畏冷思親愛  
日簷

弁山佑聖宮次孟君復韻

意行騎馬到林間  
晴霧都沈遠  
近山瓊樹著花春  
自早  
翠禽雙語意相關  
一杯到手先成醉  
萬事無心觸處閒  
猶欠抱琴來托宿  
靜中規寫水潺潺

醉後同張剛夫清風樓聯句

碧樹未黃風露秋  
晚雲蕭瑟亂山愁

趙

千家疎雨催砧

杵兩岸殘陽入釣舟

張

畫角吹殘人罷市  
清尊飲散客

登樓

趙

古今回首俱陳迹  
唯有谿聲日夜流

張



題秋山行旅圖

老樹葉似

一作先

雨浮嵐翠欲流西風驢背客吟斷野橋

秋

題萱草蛺蝶圖

叢竹無端綠幽花特地妍飛來雙蛺蝶相對意悠然

黃葵詞

仙掌鬱金衣朝陽風露晞可憐蜂與蝶祇解弄春暉

題太白酒船圖

蕭灑稽山道風流賀季真相思不相見愁殺謫仙人

寄題真定明遠亭

未到新亭上先題明遠詩雲間歸鴈小山外夕陽遲

獨夜

秋風動林葉夜雨滴池荷孤客睡不著亂蛩鳴更多

題李仲賓野竹圖

并序

吾友李仲賓為此君寫真冥搜極討蓋欲盡得竹  
之情狀二百年來以畫竹稱者皆未必能用意精

深如仲賓也此野竹圖尤詭怪竒崛窮竹之變枝  
葉繁而不亂可謂豪髮無遺恨矣然觀其所題語  
則若悲此竹之託根不得其地故有屈抑盤蹕之  
歎夫義尊青黃木之災也擁腫拳曲乃不夭於斧  
斤由是觀之安知其非福邪因賦小詩以寄意云  
偃蹇高人意蕭疎曠士風無心上霄漢混迹向蒿蓬

天冠山題詠

錄六

龍口巖

峭石立四壁寒泉飛兩龍人間苦炎熱仙境已秋風

長廊巖

脩巖如長廊下有流泉注山中古仙人步月自來去

金沙嶺

攀蘿緣石磴步上金沙嶺露下色熒熒月生光炯炯

寒月泉

我嘗遊惠山泉味勝牛乳夢想寒月泉攜茶就泉煮

玉簾泉

飛泉如玉簾直下數千尺  
新月橫簾鉤遙遙掛空碧  
一線天

醢雞舞甕中井蛙居坎底  
莫作一線看開眼九萬里  
題周秀才此山堂

青青雲外山炯炯松下石  
顧此山中人風神照松色  
曉起聞鷺

暑氣曉來清時時聞遠鷺  
還思故園路松下綠苔生  
牧廢苑

一片中原地紛紛幾戰爭至今將不去留與後人耕

黃清夫秋江釣月圖

塵土染人衣袂煙波著我船  
窻為問行歌都市何如釣  
月秋江

題王子慶所藏太年墨鴈

鴻鴈棲棲遵渚黃蘆索索鳴秋  
羨殺承平公子筆端萬  
里滄洲

初至都下即事

盡日車塵馬足間偶來臨水照愁顏故鄉兄弟應相憶  
同看溪南柳外山

送王月友歸杭州

雲本無心漫出山興來依舊與雲閒何當從子東南去  
掃地焚香晝掩關

清勝軒絕句

小草幽香動碧池暖風晴日長新  
萸南窻晝倚綠陰靜  
聽盡行人過馬蹏

題東野平陵圖

事見笠澤叢書

騎驢渺渺入荒城  
積水空林坐自清  
政使不容投劾去  
也勝塵土負平生

次韻剛父即事絕句四首

玉樹彫傷衆草黃  
夜蟲時語怨流光  
美人望望隔秋水  
不寄相思書一行

淒涼鼓角北風傳  
嘈雜琵琶思遠天  
白雪有誰知幼眇  
翠蛾空自惜聯娟



搖落山川樹影稀  
隴雲時逐鴈南飛  
苦無綠酒酬佳節  
猶有黃花媚夕暉

溪頭月色白如沙  
近水樓臺一萬家  
誰向夜深吹玉笛  
傷心莫聽後庭花

戲題僧惟堯墨梅

蕭灑孤山半樹春  
素衣誰遣化緇塵  
何如澹月微雲夜  
照影西湖自寫真

題范蠡五湖杜陵浣花二首

功名自古是危機誰似先生早拂衣好向五湖尋一舸  
霜黃木葉鴈初飛

春色醺人苦不禁蹇驢馱醉晚駸駸江花江草詩千首  
老盡平生用世心

梅花

蕭灑江梅似玉人倚風無語澹生春曲中桃葉元非侶  
夢裏梨花恐未真

送王子慶詔檄浙東收郡縣圖籍

木落江南天地秋。西風吹子過東州。  
試開圖籍尋佳處。便命舟車作勝遊。

題龔聖予山水圖二首

澤雉樊中神不王。白鷗波上夢相親。  
黃塵沒馬歸來晚。只有西山小慰人。

當年我亦畫雲山。雲白山清咫尺間。  
今日看山還自笑。白頭輸與楚龔閒。

杭州雨中

江南十日九陰雨花柳欲開無好春却憶京城二三月  
秋千風暖漲香塵

題舜舉折枝桃

醉裏春歸尋不得眼明忽見折枝花向來飛蓋西園夜  
萬燭高烧照爛霞

懷德清別業

陽林堂下百株梅傲雪凌寒次第開枝上山禽曉啁哳  
定應喚我早歸來

部中莫歸寄周公謹二首

日暮空街生白煙  
歸來羸馬不勝鞭  
明朝又逐雞聲起  
孤負日高花影眠

三年謾仕尚書郎  
夢寐無時不故鄉  
輸與錢唐周老子  
浩然齋裏坐聞香

絕句

春寒惻惻掩重門  
金鴨香殘火尚溫  
燕子不來花又落  
一庭風雨自黃昏

都南張氏園寓居

尺五城南跡似幽，鄉心空折大刀頭。  
杏花飛盡燕脂雪，日日東風未肯休。

和黃景杜雪中即事四首

雪寒淒切透書帷，極目南雲入望低。  
欲報平安無過鴈，忽驚殘夢有鳴雞。

君說江南苦未歸，香橙新酒蟹螯肥。  
何當與子扁舟去，共挽清溪浣客衣。

客裏相從意最親  
高秋快飲見天真  
明年去學潘懷縣  
滿縣栽花做好春

當年臨水照春衫  
浮玉山前水似藍  
歸計未成羈思惡  
為君飛夢到城南

東城

野店桃花紅粉姿  
陌頭楊柳綠一作翠  
煙絲不因送客東  
城去過却春光總不知

湖上暮歸

春陰柳絮不能飛  
雨足蒲芽綠更肥  
政恐前呵驚白鷺  
獨騎款段遶湖歸

即事二首

湘簾疎

一作細

織浪紋稀白  
芡新裁暑氣微  
庭院日長賓

客退繞

一作滿

池芳草燕交飛

古墨輕磨滿几香  
硯池新浴照人光  
北窓時有涼風至  
閒寫黃庭一兩章

詠逸民九首



驅車秣駑馬吾將適齊國聞有魯連子倜儻好奇畫一  
談秦師走再說聊城拔功成不受賞高舉振六翮布衣  
終其身豈復為世役茫茫千載遠安往訪遺跡躊躇東  
海上向風長太息

四時相代謝榮耀何

一作安

足恃瓜田引新蔓不見堯與

李知士解其會遇坎當復止邵生故秦吏乃亦睹茲理  
賢哉感我懷三歎不能已

子真初亦仕歲晚乃逃之區區南昌尉上疏忘其卑忠

言不見用耿耿當告誰飄然棄妻子終身與世辭抱閨  
甘貧賤所貴莫我知至今九江濱清風激羣黎神仙信  
茫昧此士獨不疑孤雲無定在逝水何時歸遐思一矯  
首悵望無由期

悠悠空山雲泱泱長江流廊廟意不屑山澤聊淹留故  
人在天位高步追巢由豈曰子無衣辛苦被羊裘東京  
多節義之子乃其尤窮居雖獨善輔世豈不優

汪汪千頃波不為人濁清道周言行表蕩然無得名誰

言牛醫兒乃是人中英當時無間言後世流德聲思之  
不可見使我鄙吝萌淳風久已漓此意豈復明時無君  
子者雖賢寧見稱

南州有高士食力事耕稼優游聊卒歲不矯亦不隘大  
木行欲顛絳纚豈足賴何為諸老翁棲棲不遑舍斯言  
其一作非無見明哲自高邁誰能懸一榻待子來稅駕

鹿門何亭亭下有避世賢鳳雛隱中林卧龍蟠其淵一  
朝起高翔斯人獨深潛功名不可為我志久已安一聞

耆舊傳使我心悠然

黃鵠羽翼長一舉思千里幼安本中原乘桴走東海舉  
世方尚同遠引存吾志流風漸異俗敦禮化鄰鄙子魚  
平生友胡乃不相委

塵事非所便田園久見招歸來三逕中蔚蔚長蓬蒿雖

有一作維不荷鉏倦濁酒且自陶茫茫大化中委運將焉逃

唐虞去已遠由來非一朝粲粲霜中菊采采忘其勞

次袁學士上都詩韻

曉日夾雲樹春風吹雪山飛鷹元兔磧飲馬白狼灣寶帶吳鉤迴金矛漢節間將軍萬里外不怕二毛斑

送陳都事雲南銓選兼簡李廉訪

送君銓選使滇池部落諸夸自品題明月夢回夔子北長風吹度夜郎西山連塞雨驂騑滑花落蠻雲杜宇嘯為問霜臺李學士白頭官滿尚羈棲

此詩見元音選本風雅作薛玄卿

杭州拱北樓

城上高樓接太霞令嚴鐘鼓靜無譁提封內向三千里

比屋同封百萬家心在江湖存魏闕身隨牛斗泛仙槎  
舉頭便覺長安近時倚闌干望日華

贈託克託特穆爾總管

將軍鐵馬擁琬弓壯歲分符鎮越中山水多情留賀監  
兒童拍手愛山公紫髯似戟君猶壯白髮如絲我已翁  
說禮數詩殊不忝看君真有古人風

和姚子敬韻

同學故人今已稀重嗟出處寸心違自知世事都無補

其柰君恩未許歸滄洲白鳥時時夢玉帶金魚念念非

準擬明年乞身去一竿同理舊苔磯

子昂仕元極被寵遇世祖與論留夢

炎業李優劣曰夢炎宋狀元位宰相當賈似道誤國依阿取容業李一布衣乃能上書請斬似道賢于夢炎遠矣子昂因賦詩云往事已非那可說且將忠直報皇元及桑哥柄國子昂首發其奸仁宗在位字而不名嘗論子昂人所不及者數事帝王苗裔一也狀貌昃麗二也博學多聞知三也採履純正四也文詞高古五也書畫絕倫六也旁通釋老之旨造詣玄微七也此詩頌朕云云雖悔出處之違心而無及矣

### 題孫登長嘯圖

在澗幽人樂考槃南山白石夜漫漫空林無風萬籟寂

長嘯一聲山月寒

詠史

酒酣斫劍氣如雲  
屠狗吹簫盡策勲  
漢室功臣誰第一  
黃金合鑄紀將軍

宮中口號

日照黃金寶殿開  
雕闌玉砌擁層臺  
一時侍衛回身立  
天步將臨玉斧來

四皓



白髮商巖四老翁  
紫芝歌罷聽松風  
半生不與人間事  
亦墮留侯計術中

偶成

竹林深處小亭開  
白鶴徐行啄紫苔  
羽扇不搖紗帽側  
晚涼青鳥忽飛來

即事

庭槐風靜綠

一作午

陰多睡起茶餘

一作西牕

日影過自笑老

來

一作夫

無復夢閒看行蟻上南柯

趙雍詩附

雍字仲穆孟頫仲子夙慧有父風以蔭守昌國海  
寧二州歷官翰林院待制

春夜曲

去年美人未還家綠窻青春桃花始花桃花今年只依舊  
美人別後長咨嗟芳心欲傳向誰憇卷却羅袖彈琵琶  
琵琶聲哀思欲絕衣上啼痕幾時滅共君別久胡不來  
菱花寶鏡生塵埃君隔揚子江妾居黃金臺臺雖高望

無極人萬里  
今天咫尺春水綠波  
春草碧來魚去鴈無  
消息日既暮  
今月色寒相思如夢彫  
朱顏青燈炯炯照  
不寐攬衣起坐空愁歎

早春

高卷珠簾日漸長  
梅花庭院雪飄香  
閒倚闌干看新柳  
不知誰為染鵝黃

莫春

綠陰庭院碧窻紗  
半卷珠簾映晚霞  
芳草萋萋春寂寂

東風吹墮落殘花

結羊腸

孟春之月春始和陌頭柳色黃如鵝落梅紛紛稍覺多  
白日炯炯曜綺羅曜綺羅日漸長春風庭院花草香十  
六初過上元節家家女兒結羊腸含情暗卜心自語何  
時得似雙鴛鴦結成羊腸腸反斷惆悵春閨坐長歎強  
持薄怒嬌且羞折花倒插金釵頭

美人曲

美人如花花不如翠滑難勝碧玉梳道修且阻無音書  
蛾眉長顰未曾舒春風吹衣裳黯然淚沾襟顰蹙出無  
心轉添愁海濱窻前紅梅花落盡不可簪玉臺明鏡如  
秋水疑有人間兩西子美人未可彫朱顏朱顏但願長  
如此

千里思

顏如花膚如雪秋水雙眸面如月千里相思不相見當  
時却恨輕離別美人美人顰蛾眉綠窻寂寂春風微巫

山夢斷君何處化作朝雲縹緲飛

有所思

紛紛落花飄美人在何許相思杳如夢寂莫春已暮一  
別久不見一往久不還相望雖只尺如隔千萬山

七夕二首

初月纖纖照露臺枉將瓜果鬧嬰孩今宵自有經年約  
何暇閒情送巧來

牽牛河東織女西相望千古幾時期夜深只恐天輪轉

地底相逢未可知

古詩

我居水精宮遠遊來朔方離家近十載兄弟遙相望始  
見世情薄紛紛名利場富貴不可期人生難忖量乾坤  
本無私江山歎興亡蟬聲噪落日露草啼寒螿明月如  
有情照我肝與腸西風動林東蕭然秋意涼回首歲云  
莫信美非吾鄉展轉復展轉愁多知夜長

思歸

娟娟秋風動客懷  
啾啾猿鶴苦相催  
魯侯不遇闕天意  
臧氏焉能沮我才  
萬里驅馳離舊國  
十年奔走在塵埃  
吳興山水何清遠  
一棹扁舟歸去來

初秋夜坐二首

夜深庭院寂無聲  
明月流空萬影橫  
坐對荷花兩三朶  
紅衣落盡秋風生

月明如水侵衣溼  
臺榭沈沈秋夜長  
坐久高僧禪語罷  
澹然相對玉簪香



秋聲

邕邕鳴鴈復南征十載棲遲在帝京黃葉未零寒未應  
秋聲偏動故鄉情

卽事

獨坐對明月遙遙千古情西風兩三日庭樹已秋聲

文徵

仲跋仲穆詩詞卷云趙待制風流習尚不減魏公而詩文不傳間見於卷軸間不過單詞數言而止未有若此卷之富者楷行間作轉益妍美後云書寄德璉姊丈蓋魏公長倩王國器也國器長於今樂府楊鐵崖亟稱之故此卷所書樂府為多豈亦因其所好邪余從烏程王天雨借觀遂題其後是歲正德己卯五月既望徵明題

趙奕詩附

奕字仲光孟頫季子舉茂才不樂仕進玉山稱仲  
光天資秀雅如芝蘭玉樹王謝佳子弟也

玉山佳處分得解字

并序

至正辛卯冬十月余從苕溪來訪玉山隱君艤船  
百花洲下適友人呂伯起御史自閩來解后於官  
驛話舊盡日賦詩為別明日攜詩偕沈自誠同過  
玉山中時省郎楊伯震龍門山釋良琦亦至焉隱

君佳客也至乃置酒於草堂復邀山陰王德輔匡  
廬于彥成汝陽袁子英同飲時霜風初寒松菊具  
秀酒半匡廬于山人舉盃屬余曰今日之會誠不  
易得子過賓且文雅能無言乎余遂以何以解憂  
惟有杜康分韻賦詩余得解字復為序首云

我從姑蘇來高臺逢呂彊共坐話當年日是不能罷迴  
瞻玉山青百里風帆挂維舟草堂前梧竹自瀟灑一別  
逾三秋相見各驚駭開筵出紅妝持盃擘紫蟹黃花照

白髮流光豈能買茲辰且盡樂一醉百憂解

春日書懷

忙裏過韶華東風日易斜黃梁應未熟白酒尚堪賒蝶

魄迷幽夢

一作草

蛛絲絆落花百年能有幾隨分度生涯

玉山與郊九成自姑蘇來吳興僧可傳邀余陪

遊弁山之黃龍洞時有紫霞同席遂分韻得花

字

盤屈度碕礧巖峯復谿舂龍居潛石洞花暖護蜂衙峭

壁生蒼蘚清泉長赤砂松濤響雲壑竹翠滴桃花杖屨  
丹梯險籃輿綠磴遮攀藤嘯猿狖並草卧麝麝絕頂望  
笠澤傾冥想女媧遙天連島嶼遠水接蒹葭道士來邀  
坐仙童為煮茶林深多虎跡地僻少人家對景詩情逸  
尋芝道氣遐窓幽塵不到境勝興無涯堪種茅山朮宜  
栽邵圃瓜寶書傳正法靈劍挂青蛇徑滑崎尤峻苔荒  
突又窪淙淙流暗澗聒聒叫鳴蛙下嶺日欲落登舟路  
更賒平田飛白鷺別墅宿歸鴉犬吠柴門近鵲唳野樹

斜菜畦黃撲簌麥壘碧交加老態倦跋涉哀形獨歎嗟  
山翁荷鋤鉤邛婦倚籬笆駐舫攜紅袖停杯挾紫霞金  
鑪薰篤耨玉手弄琵琶錯落傾香釀玻璃插豔葩歌姬  
聲縹緲醉客笑喧譁擊柝城將閉吹笳鼓尚撾卷簾風  
滅燭溼幔雨垂麻今日雖云樂他年還共誇更闌歸去  
速燈影照籠紗

雨窻寫懷

一作春日雨窻  
寄玉山徵君

幽窻談笑話平生三十年間幾度更白髮滿頭今已老

青山排闥故多情桃花灼灼應無語春雨蕭蕭尚未晴

明日扁舟攜好酒南邨荀歲正堪烹

此詩見雲林集玉  
山草堂雅集寄贈

並作  
仲光

### 送聞梅澗住弁山祥應宮

石磴懸崖人迹稀林深地僻絕塵機井邊丹竈千年冷  
窻外山雲盡日飛老虎每來廊下走黃龍常向洞中歸  
先生有道開門坐松響瑤笙月滿衣

### 遊玉山佳處寫贈仲瑛

我愛玉山奇絕處，碧梧翠竹映闌干。  
軒窗傍水琴書靜，樓閣連雲宇宙寬。  
山色溟濛還淡淡，湖光潏灩自漫漫。  
登臨縱目無窮處，落日西風作暮寒。

仲光與玉山友善，雖相去數百里，必

一月一  
致書

### 西湖竹枝詞


湖頭日日水光波，兩兩吳娃打槳過。  
笑隔笑容不相識，向人猶自唱吳歌。

元詩選初集卷十八



謹案第五十頁後三行托克托特穆爾舊作脫脫  
帖木兒今改





總校官候補中書臣吳紹潔  
校對官編修臣范衷  
謄錄監生臣楊金